

贛州府

去省城一千二百里

領縣十二

唐虞三代以五嶺限百粵贛在嶺表爲揚州之城
楚使吳起南平百粵贛地屬焉漢興始立贛縣築
城以防尉佗今州西南益漿溪城是也西漢志豫
章郡領縣十八有贛有雩都後漢分豫章置廬陵
郡吳孫權分廬陵立南部都尉理雩都晉罷都尉
爲南康郡宋號南康國亦理雩都梁陳皆爲郡隋
改虔州以寧都縣虔化水爲名○志云隋唐之初
爲虔州煬帝玄宗皆名南康郡肅宗之世仍改爲
虔南唐陞昭信軍宋初因之尋仍曰虔州紹興中

復名贛州相仍至今○唐包何和孟虔州閒齋卽
事古郡隣江嶺公庭半薜蘿府僚閒不入山鳥靜
偏過睥睨論花柳闌干枕芰荷麥秋今已至君聽
兩岐歌○許渾南康郡阻涉詩晴灘水落漲虛沙
西去秦吳萬里賒馬上折殘江北柳舟中開遍嶺
南花離歌不斷如留客歸夢初驚似到家山鳥一
聲人未起半牀春月在天涯

贛縣附郭

圖經章貢二水合流爲贛因置城邑漢縣也○輿
地紀勝云晉太康三年罷南部都尉爲南康郡其

時理雩都末年洪水忽有大鼓隨波而下止葛姥
故城衆力齊曳蹲而不動卜于其地置縣占遂徙
以就焉劉宋昇明中移置贛水東三里東晉永和
五年郡始理贛縣太守高琰築城二水之間梁神
聖初復遷贛水南志云舊城基在枳華坊今古城
巷是隋初改爲南康縣大業復舊名唐貞觀中徙
今理後刺史盧光稠斥廣其城東西南三隅鑿爲
隍宋守孔宗翰以東北隅易墊甃石冶鐵錮之卽
今城也○宋中興小曆云紹興二十三年校書郎
董德元上言虔州號虎頭城非佳名也今天下舉

安獨此郡有小警意其名有以兆之既廷臣議亦
謂有虔劉之義遂改州名贛因古縣名張子容寄
贛縣袁少府瑾山遠樓臺出溪通里閉斜曾爲謝
客郡多有逐臣家海氣朝成雨江天晚作霞題書
報賈誼此地似長沙張祐送沈下賢尉南康秋風
江上草先是客心催萬里故人去一行新鴈來山
高雲緒斷浦迥月波頽莫惟南康遠相思不可裁
○宋時贛縣有東西尉見洪邁記畧云贛尉分東
西久皆治郡下仍其方以居東部解殘于兵寄而
卽西偏蕭寺歷年所不能自還與西俱西地爽其

實尉官掾叅軍氣力差卑碌碌塵埃間視景早暮
勢不暇小有建立指日得踐更逝如脫兔如是殆
三十年予之來守也尉缺南康田橡捧檄來攝丞
忘其身之羈畢力關策經行空曠地度可容百室
者得南距橋僅百丈愿民致喜或持圃券以獻古
道旁出尚約畧可尋政走雷岡逕也郡有邸一區
其左物或憑焉不售撤之以爲堂又取墅廬三楹
以立廳事盖不伐一木而迄成云云乾道八年十
月○治後翠玉樓舊名逍遙州守留正重建取蕪
軾山爲翠浪湧水作玉虹流之句文天祥詩昏鴉

何處落野渡少人行黃葉聲在地青山影入城江
湖行客夢風雨故鄉情試問東南信梅花三兩英
□翠玉之左爲阜蓋樓文天祥詩一水樓臺遶半
空圖畫開蝸涎行薜荔雀影上莓苔碧落人千載
青山酒一杯晚烟看不盡明月却歸來○輿地碑
目云虔州衙後門城樓上有唐咸通二年刺史李
振碑唐代本州石刻無恙者惟此○貢水東江也
漢志名湖漢水發源閩中汀州府之新樂山經雩
都至府比會于章水○章水西江也一名豫章水
漢志名彭水發源南安府之聶都山東比至大庾
縣又過南康而會豫水是爲豫章水漢置豫章縣
因此名又由南康縣至府城西環比而會貢水○
贛水在府城北章貢二水會處北流至吉之萬安
縣其間有九灘曰白澗天柱小湖鰲大湖銅盆落
瀨青洲梁俱屬贛縣又經九灘乃至萬安灘之惟
石廉隅如精鐵舟行患之右此下水也若上之信
豐寧都石磧視十八灘尤險故俗稱上下三百里
贛石寰宇記云贛水從當縣北百九十二里流入
吉州泰和縣界○孟浩然下贛石詩贛石三百里
沿洄千嶂間沸聲常活活湔勢亦潺潺跳沫魚龍

沸垂藤猿狖攀榜人苦奔峭而我忘險艱放溜情
彌愜登臚目自閒暝帆何處泊遙指落星灣○八
景臺在郡治東北城邊蘇文忠集云南康江水歲
歲壞城孔君宗翰始作石城城上有樓觀臺榭東
望七閩南望五嶺覽群山之參差俯章貢之奔流
乃作詩八首題臺上其後序云軾爲膠西守孔君
實見代臨行出八景圖求文與詩以遺南康人使
刻諸石其後十七年軾尚遷過郡得徧覽所謂八
景者則前詩未能道其萬一也南康士大夫相與
請謂詩文昔嘗刻石或持以去今亡矣願復書而
刻之時孔君旣沒不忍違其請紹聖元年八月十
九日□按八景石去城東一里下瞰奔湍白雀樓
在八景臺北鬱孤臺章貢臺塵外亭螺石亭詩俱
見後○鬱孤臺一名賀蘭山在府治麗譙坤維百
步隆阜鬱然孤峙故名唐李勉爲州刺史登臺北
望慨然曰余雖不及子牟心在魏闕一也鬱孤豈
令名乎乃易扁爲望闕蘇子瞻詩烟雲縹緲鬱孤
臺積翠浮空雨半開想見之杳觀海市絳宮明滅
是蓬萊○趙抃章貢臺記云江右遐陬南康古郡
水別二派來數百里合流城郭于文爲贛竒峰惟

巖環視萬狀予嘉祐六年夏孟以言出守仲冬始
至視事屬歲穰盜息渝劇成簡英僚佳賓間爲觀
遊望闕鬱孤軒豁于前阜蓋白鵲瞰臨左右治西
北隅有野景亭舊址隳圯于是斲榛剪蔓復臺其
上前所謂二水離合氣象左右擁抱一舉目無毫
髮遺處旣而命儔舉觴援筆爲記以新其名章貢
云蓋不失實也明年六月二十三日記○貢水東
有佛日峰下爲馬祖巖道一禪師初棲此將安焉
一夕山鬼爲之築墻師曰學道不至乃爲邪鬼所
測此非吾居也因去之龔公山□巖上有馬祖

及雲端駒巖一憩塵外四亭蘇長公塵外亭詩楚
山澹無塵贛水清可厲散策塵外游麾手謝斯世
山高惜人力十步輒一憩却立浮雲端俯視萬井
麗幽人晏坐處龍虎爲斬薙馬師獨何疑空墜山
鬼計夜垣非助我謬敬欲其逝戲留一轉語千載
起攘袂○輿地紀勝云景德寺劉宋建舊名安天
在府治東南隅地勢夷曠瞰覽城南山水梵宇雄
麗以間計者二千六百佛像萬餘又有慈雲寺亦
在城東南唐建舊名景德宋黃庭堅詩城東寶坊
金碧重道人脩慧剪蒿蓬一瓶一鉢三十載瓊椽

碧瓦上秋空稻田摩衲擁黃髮更築高閣諸天申
三后在天遺御墨百神受職扶琳宮文思帝澤餘
滋潤雨露下國當年豐貢川章川結襟帶梅嶺桂
嶺來朝宗參旗斗柄掠闌楯清坐耳聞河漢風道
人飽叅口挂壁頗喜作詩如已公家風秀句刻琰
琬邀我落筆何能工安得雄文壓勝境九原喚起
杜陵翁○景德寺西爲精忠祠宋紹興二年虔吉
盜彭友連兵寇掠循梅廣惠英韶南建邵汀諸州
岳武穆討平之初高宗以隆祐太后震驚之故密
令飛屠虔城飛請但誅首惡而已于是虔人德之

繪像建祠曰精忠二字蓋平虔後高宗手書以賜
飛者○輿地碑曰景德觀碑徐錯記徐鉉篆額天
慶觀石磬徐錯作詩仍爲銘○社岡一名鼓嶺去
城二里舊俗每社日邑人祀神群聚岡頭會飲○
建春門外水東雷岡之上有嘉濟廟俗呼江東廟
神姓石名固縣人也當漢灌嬰捍南粵時道經祠
下神降于絕頂峰告以克捷之期乃立石固王廟
于崇福里唐大中改建雷岡琢石爲像宋周延雋
趙抃曾阜三公皆以六月解郡水涸乞靈于神坐
間漲數尺又孔守平仲祈雨反風其應如響建炎

三年隆祐孟太后自洪州移蹕至虔金人深入至
阜口彷彿見陰兵甚衆乃去詳見 國朝宋景濂
江東廟記舊有唐進士楊知新及楊吳人薛光範
二碑○鳳凰池在治東南二里池中石竹叢生俗
傳鳳棲其上紹興丁卯太守魯慥脩譙門掘地得
石識有鳳皇池上出名賢之語○貢水傍有玉虛
觀志云在治東二里宋治平中提刑某自城中望
見觀中隱隱祥光起使人踪迹得道人名劉繼先
脩煉于玉虛劉常坐叢棘中光從此起提刑異之
固請入城至水際忽不見或有言去之空同山矣

有雙趺隱然石上今觀中有五丹井最後有丹臺
卽叢棘處 國朝大學士解大紳縉碑記其事○

縣南三里有路嗣恭祠寰宇記云唐大曆九年嶺
南將哥舒晃反嗣恭統五嶺兵討斬之師之所處
民不疲勞爲置生祠以顯遺愛○盧光稠墓去縣
三里東林寺前俗呼盧王墓唐光啟元年南方盜
起州人譚全播與衆推光稠爲刺史據虔州天復
二年出兵陷嶺南之韶州梁初江南嶺表悉爲楊
吳及南漢分據光稠獨以虔韶請命京師願通道
輸貢梁遂以爲百勝軍防禦兼五嶺開通使開平

三年卒○天竺山出城四里貢水東舊有脩吉寺
唐元和間僧韜光自錢塘天竺駐錫于此蘇文忠
集云予年十二先君自虔州歸爲予言近城山中
天竺寺有樂天親書詩筆勢奇逸墨迹如新今四
十七年矣予來訪之則詩已亡惟刻石存感涕不
已而作是詩云香山居士留遺迹天竺禪師有故
家空詠連珠吟疊壁已亡飛鳥失驚蛇林深野桂
寒無子雨浥山薑病有花四十七年真一夢天涯
流落涕橫斜○廉泉在治東南隅之光孝寺方輿
勝覽云在報恩寺本張氏居宋元嘉中一夕霹靂

忽湧地爲泉時以歸功太守名曰廉泉蘇子瞻詩
水性故自清不清或撓之君看此廉泉五色爛摩
尼廉者爲我廉何以此名爲又云贛水雨已湧廉
泉春未流同烹貢茗雪一洗瘴茆秋東坡又有崇
慶院訪廉泉觀寶輪藏記○輿地碑目云臨池禪
院四大字唐鍾紹京書在城東五里惠靈院紹京
工書時人號小鍾輿國人詳見本縣○塚廟記云
葛姥祠在縣東北五里葛姥者漢末避黃巾賊來
自交趾資財巨萬僮僕數千于此築城爲家沒後
有靈異鄉人祠之卽晉太康末年遷縣處○迹異

記云贛縣西北十五里有余公塘上有大梓樹可
二十圍樹老中空山都穴焉晉元嘉中縣民袁道
訓道靈兄弟伐樹取窠山都見形謂曰我處荒野
何與汝事今當焚汝宇以報汝之無道至二更火
起合家蕩盡又云南康有神名山都能隱形形如
人長二尺餘黑色赤目黃髮巢于深山樹中窠如
豎鳥卵高三尺許內甚光澤以鳥毛爲褥五色鮮
明旁開孔如規體質輕虛○通天巖在城西二十
里有廣福院院後嵌石如房穴透山巔巖洞高廣
數十丈中歷三級有石象石田石鐘鼓之異內通

小洞亦廣數十丈深五六丈有石井石碁盤宋元
祐中郡人陽行先隱此巖下有趙清獻題名張無
盡所琢石佛 國朝正德丁丑新建伯王公平龍
川泐班師游此作平南記刻洞壁扁曰陽明小洞
天其詩云青山隨地佳豈必故園好但得此身閒
塵寰亦蓬島西林日初暮明月來何早醉卧石牀
涼洞雲秋未掃○儲潭山在治北二十里晉咸和
初有漁者釣潭中得金鎖引之可數百尺忽一物
隨鎖而來似牛眼紅角白見人驚駭曳鎖急走漁
人以刀斷鎖得數尺南康記云咸和二年刺史朱

瑋率兵赴討蘇峻至此忽有神人曰予弋釣于此百餘年帝以予司此水府君能爲立祠宇當有報焉瑋卽爲置廟山下江山迴沓瀆而成潭故名儲潭君廟及瑋至建業果有功而還○南康記云赤石山大石連聳粲若舒霞山角多赤石有王房瓊室狀者舊相傳宋元嘉中有安道士棲此中數十年唐天寶改爲王房山在縣東南二十四里○寰宇記云龍翁穴在治東二十六里昔有女道士丘氏于汝山之中峰松樹下白日上昇汝山距穴西二百步有昇仙峰爲梁天監年事按卽文潭嶺也巨石盤亘其下有潭廣數十丈舊傳有漁于潭中得大小銅龍五枚大者長丈餘小者半之○丘貞仙汝潭山居人自幼慕道擇汝山剡觀脩煉嘗鑄五龍以鎮五方鄉民遇旱禱之卽應東廊壁戲寫墨雀能飛下啄食○玉石山在城北四十里俱黑壤惟有片石鮮白如玉昔有瞿氏釣山下有二少年皎若冰玉謂曰別來此石長殊駛已忽不見石上有冬桃樹及石杖云昔有引杖擊桃去而留杖于此○至德觀在城東四十里宋至和中有方外人于道堂東壁畫墨鵲觀中時聞鵲噪之聲鎮觀

有五銅龍今失其一卽得自文潭中者又有銅錢徑二寸文曰天策都師楚王尚父八字○崆同山在城南六十里一名空山自南康數十里宛延而來章貢二水夾以北馳蓋一郡之望也山麓周廻百里唐十道記及南康記皆云山巔有湖湖有艚艚底人或動之風雨立至晉咸康五年太守庾恪于山西麓建空山祠祈雨皆驗○黃唐山在治北六十三里登山右行六里有石室口方八尺如數十間屋上通天窓下有方榻二石人巾櫛而坐旁有小石室七所相通悉有石人室前有車馬跡春

夏不草無毒虫林木繁茂水石幽絕山下居人每丙日輒聞室有笳鼓笙樂之音蓋靈仙窟宅也鄧德明南康記云山角有石子如彈丸至丙日則不見他日皆在其山獨立高千三百丈呼爲黃堂廟○螺亭山在縣東南七十里巨石臨水處昔有貧女采螺爲活與伴侶暮宿此亭忽中夜聞風雨聲見衆螺張口亂嘍其肉伴侶驚走貧女死焉旦日但存白骨殯之水濱其冢化爲巨石螺殼無數凝結石畔○縣北百里有合龍山其地荒寂無人居惟一僧卓菴山下農家生子出胞卽垂眉三尺不

食母乳七歲不能言其家送之菴中宋仁宗朝令郡縣津送至京入宮忽能語詔削髮御筆賜名行本時年十二錫賚併後宮凡直千萬餘貫放還鄉悉以所賜爲寺其師市木于虔化深谷中一夕大雷雨江漲合抱樑棟隨流而至菴前及寺落成行本對佛合掌而逝今寺中金龕羅漢及御書法名尚存○龔公山在城北一百二十里今爲寶華寺有馬祖遺迹及泐潭龍井其上奇峰翠巖前後連延蘿木泉池左右襟帶昔邦人龔毫棲舍于此馬祖道一禪師自水東佛日峰遷來者山有鄧隱峰

松龐居士竹靈照女蓮蓋皆馬祖座下

雩都縣

在府東百五十里

本漢南海揭陽縣地漢高帝六年使灌嬰防趙佗立縣在城東四里東溪之上屬豫章郡陳時遷治太昌村隋還故處唐初治復仍陳貞觀中大水安撫大使任懷玉移置南康古郡卽今治○研譜云雩都有灌瓦可以爲硯按志云灌嬰築城東溪雩人卽其駐壘處廟食之嘗有掘其地得瓦以爲硯太守洪邁作灌瓦硯銘曰范土作瓦旣埴旣已何斷制于火而卒以圉水廟于漢侯今千幾年何址

麓祀歎而此獨也存縣贛之雩曰若灌池硯爲我
得而銘以章之○雩山在縣北二十五里蓋古望
祭之山因名雩水出其下入于貢卽贛水也雩山
倒影入于瑞蓮池池去縣西二百步產蓮甚奇花
曰雙頭曰丫髻曰三萼曰念四葉子曰覆鐘曰金
鋌葉曰雙捲曰劍脊移植他池則不能奇以此知
爲倒影所致○南康記云貢水有金雞山石色如
霞旁有穴廣四尺一石正當穴口如彈丸晉義熙
中金雞三見山中人彈之化爲石宋永初中又見
志云在縣城西三里○羅田巖在縣南五里巖凡

三中高二丈深丈五尺兩旁相通其形如虎一云
是虎穴峭壁懸崖中有曲水流觴茶竈藥爐悉具
宋時勅華嚴院岳飛過此作詩云手持竹杖訪黃
龍舊穴空遺虎子踪雲鎖斷巖無覓處半山松竹
撼秋風周茂叔倅郡時亦有詩刻○又五里曰通
巖高丈餘周丈五尺前後洞徹中通人行宋紹興
知縣鐫額慶元知縣勒銘○又三十里曰需巖凡
二洞上下懸隔鑿磴而通高三丈深二丈其形如
獅邑人王鴻者義獻之後也工篆籀詩畫效元次
山嘗隱于此福州劉彝詩云冬寒夜憶王夫子獨

坐需巖治古書○祈山在縣西南二十里前有小
阜七名北丰山唐時有梁真人者脩道于山之紫
雲觀被召不赴乃折檜樹一枝倒懸丹竈傍湏臾
登木杪而去不知所之○縣西四十里三洞聯絡
嵌空玲瓏各可容百餘人石乳重重欲墮五色絢
爛扣之鏗然作玉磬音彭彭若鼓溪流貫注之上
曰白雲嶂中曰太虛巖下曰龍巖○雩水在縣北
三十二里源出雩山上流寧都江挾石城水自東
北會昌江挾安遠瑞金水自東南皆逶雩城而西
稍南出峽又稍南則興國江水自西北又前二十
里則信豐江挾龍南水自西南皆與雩水合入郡
城東會章水志云上流之灘其名曰葛湫八賴井
洲鷓鴣藥口大傳車頭小萬苦竹長灘率口牛牯
凡十二○雩峽在縣西北五十里兩岸陡絕可二
十餘里有砂洲長二百餘丈砂生三角與常砂異
色白如粲名米砂土人視其厚薄以占米價云○
南康記梓潭有大樹其本丈餘垂蔭數畝吳王芮
會都尉蕭武伐爲龍舟旣成挽之不動占云湏臾
男女數十人爲歌樂引之乃行如其言舟忽飛入
潭中挽者胥溺至今夜宿潭邊者猶時聞歌唱聲

按志潭在縣東南六十里而寰宇記作樟潭山在縣東百八十里言漢時有阿隄樹伐以爲龍舟槽砍而出血伐人並皆沉死福建漳浦亦載之其壤相錯○寒信峽在縣東北六十里黃金鄉中重岷夾壁每歲峽中先寒俗訛爲韓信立祠其傍○黃金鄉安下里有唐楊筠松墓竇州人僖昭之亂斷髮避地虔州盧光稠使卜天子地改葬父母已問尚有此地否曰有一席十八面皆王者地盧忌之遂毒楊楊携其徒曾文迪劉江東夜遁去至此問名爲藥口悟曰藥到口吾其死矣遂葬焉□文迪雩都人天文識緯內經地理之書無不精究其墓在袁之萬載西山○柴侯墓漢靈帝時劉叔喬也避地于雩都東南七十里山中預爲柩櫬自書曰漢柴侯人始知之爲塋村側晉末盜發其冢忽大風雨山之松栢悉飛棺化爲石○縣西七十里石室穴有葉船從下流還縣者未至岨數里一衣黃人擔黃楮兩籠求載因而乞食船主食之及濟唾于盤徑入穴去此人異之回視唾悉是黃金○夜光山在縣西北八十里耆老相傳時有夜光若燎原之火從峽泝流十里至于蛟窟而沒其處有太

平山瀑布幽蘭馨香時發可供遊賞今卽太平公館○干霄山在縣東南七十里南康記云產松杉莞筍石蜜○珠玉山在縣東南二百六十里上古產珠玉本名官山唐天寶改今名南康記云山高峻有珍禽香草○高沙寶山在縣東北百二十里兩峰並高勢如伯仲宋時有樵者遇白兔逐之入地掘地尺許銀鑛溢出○雩有明覺寺僧伽院五季末邑人事吳僧伽以爲生佛院後竹林中一竿特巨僧伽常五夜擊竹而歌寺僧厭之伐去巨竹俄而芝生其根宋祥符巳酉示寂之日有商蜀中者遇之僧伽化後竹筍生其牀下明解縉紀其事甚悉○縣東紫陽觀內一泉間日其酸其日汲以釀特美宋洪邁四言詩悲彼其泉出自東方發源雩山鍾于紫陽冰清玉潔源深流長君子至止鑑亦有光○縣東有龍鐘潭相傳吳王芮遣將軍蕭武自盤古山運鐘過此沒焉漁者時或見影岍有蕭將軍廟今廢

信豐縣

在府東南
百七十里

本漢豫章南楚縣地吳置南安縣晉改南康唐末淳初析置南安及天寶改天下縣名相同者因泉

州有是縣奏改信豐以民信而禾豐也今城西南
二城門名因之○城中孝義坊有寶塔寺塔九層
日中無影寺左有鴨公池俗有鳳凰來宴鴨公池
之讖卽此○縣之奉真觀右有鳳凰井井脉通石
鼓潭出五色魚○西廂外二百步九日岡勢如覆
釜其頂方而夷可坐百人每重陽日士女登高于
此○南廂外二里南山有寺曰南山寺宋呂大防
墓在寺之右紹聖四年以紹述說行連貶大防安
置循州行至信豐病語其子景山曰吾不復南矣
汝歸呂氏尚有遺種乎天下哀之哲宗聞計顧左

右曰大防何以至虔州皆莫敢對○夷堅志云信
豐縣水南有瑞蔭亭亭前兩巨樟相去百餘步其
高拂雲枝幹扶疎類煙霄中物紹熙癸丑秋大水
浸縣鼓樓兩樟之間爲水淘洗露出一連理枝自
東阻西長四十五丈枝下去地丈許○穀山在縣
西二十里有石如人下臨穀水山半有芙蓉屋懸
巖乳泉下滴幽勝南康記云晉葉率爲九江太守
與兄大司馬混太守仲通避劉曜之亂奔豫章南
埜東界率卒于穀山混卒于首方口仲通卒于烏
漾灘按皆今縣地有廟祀焉○鐵石巖在縣西南

二十里二門相對中可容百人又有石井龍巖昔
龍穿而過見右爪歲旱禱巖中鳴鼓水洶洶而已
篩金則長瀉○巫山在縣西北三十里接南安之
南康界有嶮嶺其上多椎石有巨人跡巫水出其
下會綿水入于桃江○按桃江在縣東源出龍南
縣東桃山北五百三十里至信豐營入貢水有灘
十五曰烏漾枯木三摺梓木石瀨龍江圓潭上寒
下寒上智咽人三港下順劔門車輪斷龍諸灘惟
烏漾石峻舟楫難通近年始鑿去○廩山在縣西
四十里山下有湖水中出五色鯉高一千五百五
十丈○縣南四十里金鐘山上有二石筍高數丈
絕頂有古寺又其處有三明山三峰鼎峙五層石
塔一勺泓泉灌注于中○古錢岡在縣南六十里
土色赭而圓如錢故名又十里爲香山根蟠三十
里有九十九峯小溪十八多藥物昔人見百鶴飛
來各棲一峰其一不下群鶴復飛去○黃石洞在
縣西南八十里高數十丈中有石人兜鍪作按劔
狀後有石獅石象踞其左右甚肖有飛淙綠崖噴
珠濺玉出山半小洞中○松子石筍在縣南百餘
里筍有三十餘條約高五百尺其處三峰屹立如

筍皆高數十丈○大龍山在縣南百二十里有龍井夜則紅光燭天巖洞數十產紫草藥果又嘗見異花如白蓮○猶山在縣西百二十里分九十九面亦產異藥○新龍山在縣南百五十里有塔二座乃普濟禪師學佛之地

興國縣

在府東北一百八十里

宋太平興國中析贛縣七鄉益以廬陵泰和之地立縣于湫江鎮因年號爲名○縣舊無城元末始築方五里開八門其北泰和門南曰奉符門下南曰朝宗門有玉川館在奉符門外○湫江在縣東

北源出衣錦鄉吳公山西會于濺○濺水在縣西流至東澗口二百里與湫水合而名爲平川行百六十里至平固江口又八十里入于貢○治西宋大乘寺唐之萬年寺也有銅鐘爲唐物宋紹興初一夕失去贛縣漁者得之文潭中鬻于天寶寺考之無聲他日大乘僧物色到贛求贖不許曰果爾寺物試扣之大乘僧一扣其音愈洪乃以歸○縣西北二里治平觀晉葛仙翁洪游豫章過此觀其靈秀遂居焉留詩于觀之洗藥池云陰洞泠泠風珮清清仙居未劫花木長青觀門外有葛洪丹井

深三丈許底有巨石仙蹤竅中出泉味殊勝○太平巖在縣東常清觀後內有石竈石人水臺竹橋之勝○玉山在縣西十五里視衆山獨高有五峯曰獅象香爐鉢盂錫杖南康記云興國玉山上石桃故老云昔寒桃生于嶺巔隱淪之士將取啖之因變成石按志靈山在縣東十五里山腰石窟中有石如桃卽此山也山下龍華寺側有靈泉清冽不涸一名玉珠泉○東龕巖在縣東北二十里舊爲鍾紹京讀書處巖前有石截焉中分上有飛泉百尺下垂如練兩旁壁立不可徑水流石罅間下通小舟巖中可坐數十人正面一峰竒峭如筍惟松異卉交羅其上石如舫倚其旁巖水由靈湖來○紀勝云東龕寺東巖有唐中書令鍾紹京書堂石案石硯石臼具在鍾傳手放巨魚于靈湖帶以銅環人時見之○十道四蕃志云興國上洛山有木客形語似人遙見分明近則藏隱自言秦時造阿房宮採木者食木實得不死能砍杉枋與人交市易人刀斧交關者前置物枋下却走避之木客尋來取物下枋與人隨物多少甚信直不欺有死者亦哭泣殯塋嘗有山人行遇其塋日出酒

食啖人南康記又云山都形如昆崙奴通身生毛
 見人輒閉目張口如笑好在深澗中翻石覓蟬噉
 之嘗就民間飲酒賦詩云酒盡君莫沽壺傾我當
 發城市多囂塵還山弄明月○縣北八十里有小
 石如人立而冠分支為秦娥峰相傳娥來自楚得
 道能行風雨卒人立廟祀焉廟有東西二井及曬
 衣石衣影尚存○覆笥山在縣北百七十里東望
 金精西望芙蓉北接青原南瞰章貢為邑群山之
 宗○雲牕私志云滄子至平固縣山中扣石忽開
 中有宮室額曰輪寥之館發石笥得書十二卷讀
 之欣然遂著天人經四十八篇故名其山曰覆笥
 按平固孫吳析贛地置平陽縣晉改平陽曰平固
 隋文帝時併入贛縣興國蓋自贛析來者真仙通
 鑑云山頂有湖周數里多靈草異物有石鴈春秋
 時能群飛湖旁有石井及小石笥笥藏玉牒記名
 山福地及得道人姓名石井通泉口廣二丈高七
 丈石笥中玉牒云是王孝子所留書○山堂肆考
 云興國之儒林鄉有石圓如龜項背皆具人謂之
 龜背石彷彿八卦形象逐月隨斗杓旋轉士人疑
 其惟移置他所翌日復歸故處人因祀之○縣衣

錦鄉有文天祥勤王壘累石為墉三層其隘上署
 都督行府額禡祭之夕扁為雷擊破尋兵敗鄒嶧
 先為元兵所執不屈而死○太平鄉有統制石宋
 末統制鞏信從文丞相勤王元李恒追至方石嶺
 將及信以短兵接戰元人疑有伏不敢進信坐巨
 石箭雨集被體屹不動至死不僵後人呼為統制
 石至今行旅過其下必式○空坑在縣界宋德祐
 元年安撫使知贛州文天祥奉詔勤王自引兵從
 梅州出江西復會昌敗元軍于雩都復吉贛諸縣
 遂圍贛州元將李恒遣兵援贛而自將襲天祥于
 興國之空坑兵潰趙時賞等死之天祥走循州○
 蓮花山崖石俱在縣東百四十里舊傳文丞相駐
 兵處累石為城基尚存後人于崖石獲寶劍即此

會昌縣

在府城東
二百里

宋太平興國七年又析雩都六鄉于九洲鎮地置
 縣未立名適鎮人掘井得古甌甌十二其上皆有
 會昌篆字事聞因以名之紹興元年陞軍元為州
 國初仍為縣○明山在縣河北二里邑主山也寒
 泉飛瀑巨石對蹲上有六祖寺下有五坡石○又
 三里為三門洞為湘洪水水合綿湘兩江西北過

零都流入貢水蛟蜃居之其深莫測多怪石○西
巖在縣西南七里邑人尹天民讀書處前有石牕
石鼓瀑布水簾試劒石六和精舍○魚潭石在縣
南二十里亭立江滸爲遺老周伯綸釣磯又十里
有大明巖寺廣數丈下爲法堂旁有水簾隨風舒
散○注米巖在縣東三十里深廣二丈許伏虎禪
師駐錫處有小竇相傳出米隨人多寡可給後人
鑿之僅有泉流○九仙巖在西北五十里深廣三
里許相傳巖內有九龍後爲九道士乘之飛去○
蕭帝巖一名佛圖巖在縣南百里狀類伏獅而口

仰張內虛可容百餘人舊爲齊武帝避兵之地南
史蕭頤爲贛令江州刺史晉安王子勲反帝不從
勲命南康相繫帝郡獄帝族蕭欣祖等破獄迎之
帝于是率部曲百餘人起義屯揭陽山或云梁武
帝徵時讀書于此有古院○仁峰在縣西一百里
舊傳有石室石臺祀張賴二神臺旁有竹一竿風
來則偃而拂之其屋潔淨無塵石竅中泉不涸飲
之可愈疾○仁峰張十郎祠舊在羊山人以羊供
祠中縱之不去虎亦不傷縣令余文震遷其祠羊
乃化爲石○舊傳有余侯獲神龜將招山寨海無

何龜亡而侯亦卒塋縣北百里余侯峽其傍有廟
及故宅遺址或云卽會昌峽也○聖姑石在縣南
一百十里瀕江如人形篙師過必擲石以上吉凶
○四望山羊角水俱在縣南百二十里東通福建
武平縣界南抵廣東程鄉縣界羊角水一名郎溪
湘水發源于此○鴈門峽以狀似鴈門而名兩岍
高山中列三石破江水爲三道又號三門峽○滎
陽水在縣東南南會東水上輔水總一百九十里抵
潮州海陽縣界○盤古山在縣東南一百二十里
周圍石壁亦號盤固有羅漢巖可容數十人有白

蓮池廣一畝唐十道記盤古山有獸如車輪而其
聲似雞犬或六足或八足能負兩三人□北堂書
鈔盤固山其峰有石井井側有大銅人常守之五
十年水一涌高起數十丈銅人每以手掩之卽止
其山盤紆峻嶒因號盤固○漢仙巖在縣東南一
百二十里舊名漢溪深廣數十丈相傳爲秦王讀
書處有石竇僅容一人匍匐而入至讀書堂又橫
過石壁有石龍數丈見者咸呀爲真又有枯木一
枝大不盈握橫亘絕壁山風狂吼終古不墜俗謂
之仙女挂降真又有鷹蹲僧帽羅漢龍頭葫蘆蟾

崧天河天開諸石玉筍天竺二峯天開閣月鏡臺
會仙亭金剛窟滴水汜白龍激萬松菴一線天白
蓮池石罅泉石獅石龜笏碣仙人奕諸景人謂可
匹閩之武夷○巖洞相傳爲漢仙煉藥處日久秦
蕪皇朝穆宗五年僧明圓自寧都來宴坐洞口
中夜鬼擲沙石盈膝不爲動詰朝里人聚觀圓合
掌曰山靈果許我居此當以鐘鼓三聲爲信祝未
已俄聞巖中有鏗幣之聲遂誅茆焉左右石壁斧
鑿難施圓日夕向壁持唄呪不輟至五月十四忽
雷電晦冥劃然石開五尺許于是次第施功爲會
昌著勝○述異記南康郡有君山高秀重疊有類
臺榭名女媧宮有數名格形似猩猩自知吉凶人
無機心則可馴狎欲執害之則去不來按志在縣
東南一百八十五里與盤古山接中有玉臺方廣
數丈周迴盡白石覆如屋四面多松杉亦曰女媧
石輿地紀勝以雩都君山距盤古之北五十里風
雨過後景氣明淨頗聞有鼓吹聲皆山都木客爲
唱舞之節

安遠縣

在府南三百四十年

梁大同十年置此縣尋廢唐德宗貞元四年以雩

都地僻人稀每有賦役動逾星歲復析零都南三鄉併信豐一里再置宋因之元至元中省尋復置國朝因之○唐書云建中三年刺史路應請建定遠縣築臺縣治內曰萬壑臺○治左南山觀有題云何年建此南山觀今日來游東海仙詩草漫留黃竹逕墨花亂洒綠蘿烟蓋皇朝張汝弼別號東海善草書志謂詩卽汝弼作非是乃和汝弼者耳○打鼓嶺在縣南十餘里巔有石鼓鼓旁二石人對立邑譙樓鼓鳴輒應之後斷石人手遂不然○又五里爲九龍嶂上有龍潭可以禱雨○寰宇記

云欣山凡十有二面高五百丈上有蓮花池石巖如室巨石如牀產朱橘異竹林木芳潤登覽令人怡悅其水南流入循州雷鄉縣○馬鞍山在縣東十五里有小池巖桃竹亦佳又五里曰熊嶺高峻可二百餘丈○蓮花巖在縣西二十五里循山嶺穿石徑而入兩山峭立中藏一洞巨石倒懸下爲佛寺傍有石龕二古塔一又有飛瀑從天際而下經洞口流入溪澗中○縣南一舍許有南逕逕路長十數里逕口卽石也高三十餘丈狀類狻猊○三百坑水在縣南四十里源出三百坑東流一百

五十里至縣九洲河始通一槓出縣二百五十里入廣東龍川縣○紀勝云蒼山程子山以紹興癸亥自西掖謫知安遠過凝福院見其西一峰如黛爲名擢秀而留詩院中子出諱敦厚以忤秦檜由右史左任者擢秀峰在縣西八十里○龍清巖在縣東百二十里巖前清流縈帶大小巖穴凡數十宋建隆中僧靈照住此巖之壽昌寺絕粒咽氣居巖罅中至淳化五年示寂語其徒曰吾去三日入塔後二十載可開視之祥符中其徒啟塔梵相如生○大帽山在縣之黃鄉保萬曆四年刈屬新設長寧縣去治三百餘里○紀勝云安遠水在縣西二百二十里縣以茲得名

寧都縣

在府東北三百六十里

按郡乘吳析雩都置陽都縣晉太康初改爲寧都五年又析寧都置陂陽縣○南史宋永初元年南康國領七縣有寧都有陂陽大明五年領八縣其一爲虔化蓋又析自寧都者隋開皇中寧都陂陽俱併入虔化宋紹興二十三年改虔州爲贛因復虔化縣爲寧都○通志云吳析雩都東北陂陽鄉置揭陽縣晉太康徙縣治于陽田營劉宋昇明間

又徙縣治之徐觀始改今名及隋開皇改虔化復徙今治宋紹興中復曰寧都元陞州 國朝仍爲縣○按陽田營在桂竹里徐觀在太平里以太平而改名寧也白鹿洲在縣南五十里仁義鄉吳時治也虔化屯在縣西五里隋時治也輿地紀勝云其處有石如虎下有陂又云虎化爲石縣不曰虎化而曰虔化蓋古文從几而諱虎之名○縣有子城唐太和間築宋紹興增脩五百餘步環以外池紹定六年復築羅城○長春谷在縣東一里邑人孫立節胡埜讀書處○延春谷在縣南里許其下即贛江也有雙魚洲浮卧江中狀如游魚巨浸不沒晝錦亭建其上○篔簹谷在縣西北七里與金精山相望脩竹數十畝翠篠蒙密中有飛來獅子二峰翠巖釣臺瓢泉諸勝水竹幽居宋儒魯興宗所築以處從游者○輿地紀勝云縣西八里安國寺有五代末御史大夫郡人裴愉碑記在隔江崇福寺有脩寺碑及食堂二記皆裴愉筆志云裴愉墓在縣之石城宋江後唐禮部尚書也○官人山在縣西北十里石崖環立無路可通須捫蘿而上唐季黃巢之亂官吏多避難于此上有天宮寺山

麓泉湖滉漾人謂之小桃源○金精山在縣西北十五里中有石室容萬人又有金牀玉枕兩面懸崖百餘丈圓如鼓元名石鼓山□舊記有十二峰峰頭皆石望之如陣雲道家列爲三十五福地秦漢之際山下居人張芒女名麗英字金華年十五面發竒光家有白紈扇恒對以爲鏡他日登山得二桃食之遂忘饑渴長沙王吳芮伐閩越道此強委禽焉女曰山有石室中通洞天能穿石當爾見芮乃發兵通穴復使聘焉女曰吾爲金星之精降治此山豈塵凡能近乃仰卧被髮覆石上使者以

爲死矣忽紫雲鬱起失女所在當冲舉時歌詩十
八章今存其五
一曰石鼓石鼓悲哉下土自我來
觀民生實苦二曰哀哀世事悠悠我意不可闕兮
王威不可奪兮余志三曰有鸞有鳳自舞自歌何
爲不去蒙垢實多四曰凌雲燦漢遠絕塵羅世人
之子于我其何五曰暫來期會運往卽垂父兮母
兮無傷我懷至今石鼓一處黑色直下儼如垂髮
□稽神錄云金精山巖高數百尺有二木鶴仙女
各一乘之鐵銷懸于巖下一鶴恒隨四時轉不差
忒百勝軍小將陳師粲者嘗與鄉里女子遇于巖

下求娶焉女子指鶴曰能射中此目乃許師粲一發而中臂卽無力歸而病卧見二女道士繞牀行以手拂其目數四而去竟失明卒所射之鶴自爾不復轉其一如故□舊志縣西南八里東陽巖中藏有木鐘金精木鶴鳴則木鐘應之金精山人者宋廖瑀之別號也年十五通五經建炎中以茂異薦不第所著有懷王經行于世○君子峰在縣北二十里形如卓筆與濠山對下有衷愉舊廬○鈎洲在縣南二十里彎環曲折如鈎地不數百武舟行必遲回半日始至○東華山在縣西北二十里

隔礪爲青陽洞甘泉巖○輿地紀勝云桃林寺在甘泉巖寺內有李後主重陽詩及禪月師畫十八羅漢孫志康題名○蓮花山在縣西二十五里峰巒轟轟如花巔有三峰中爲仙女湖下有龍湫鎮以巨鐘構祠祀焉○濠山在縣北二十五里山間雲氣濛濛懸崖飛瀑注石池中頂有巖方丈前爲戶牖石牀石梯不假斧鑿皆天成中虛一巖可容百餘人自餘巖穴小大各極其妙相傳晉時里人賴箕廬于此○璜溪在縣南三十里流自梅川形如半壁水聲珊珊如觸玉璜○白茅峰在縣西三

十里生白茅下亦有龍潭四時常吐雲氣又有龜湖亢旱不涸○武頭山在縣東四十里發脉自闔盤據數十里為邑祖山南康記南宋大明中有人至其巔者見一池廣可百丈水色如丹旁有顆粒如珠有光再往竟失其所原名虎唐避諱改武○宋德祐乙亥歲文天祥勤王使趙時賞一軍取寧都未至邑西北六十里竹林偶爾作書有所徵發泚筆竹葉上自後此林竹葉生有墨暈○寰宇記云梅嶺在縣北一百二十里古多梅樹閩越及漢使諸校屯梅嶺即今邑界也嶺下即梅川經麻源

下坡梅口東南會白沙白鹿東北會鰲溪小溪西北會龍溪桃溪為西江流經雩都入貢水○虔化水源出唵山接撫州崇仁縣界在縣北二百四十二里流至雩都則名雩都水○清音水在縣清音壘源出天株山過逕步釣峰錦口陳池城口雀坊會王觀渡入西江

瑞金縣

在府東二百八十里

唐瑞金監昭宗天祐元年析雩都象湖鎮淘金場置南唐保大十一年陞為縣宋太平興國七年割地益之合編戶八里○紀勝云宣和壬寅鄧衍領

邑事于縣之圓通院建六友堂蓋同時丞方庭實
簿張參東尉余誼西尉方某監務何常併衍凡六
人同登政和甲午進士科紀其盛云○鄧令于東
明觀建潔襟亭以覆陸公泉者泉在縣西南一里
按郡志宋大觀中縣尹陸蒞搜尋勝跡得唐人陸
藻軒前山色依然綠溜下泉聲漱玉寒之句因于
石竇間浚得此泉後被召去邑人以其姓名泉也
通志謂唐陸藻兄弟來游導泉淪茗題詩而去致
候官陸蒞以太常少卿坐議原廟不合謫任藻其
弟也登崇寧二年進士而二志俱云唐人未詳觀

內有蘇子瞻七言題詠一首○黃芝園在縣南里
許雲龍山麓嘗產靈芝之有黃雲覆之○縣東里錦
被嶂狀如簾幙下有錦陂按卽聶都山山海經云
贛水出聶都山卽此也○寶蓋峯在縣西北二十
里其水流爲蜀溪僞唐有師郭璞術者卜地寶蓋
下或竊之以塋其人在家忽耳聞金鼓聲驚曰此
必有盜吾地往視之已無及後塋者歲發疫癘忽
大雷雨見黑龍由墓中湧水而出遂成溪○龍霧
障在縣東北二十五里有仙女池謝仙翁祠仙翁
後周時人登龍霧障採樵偶于池側見二女奕從

韓州府志卷之十一
旁觀之女食桃遺核因取食之不饑奕罷恍失所
在謝駭而歸不知若干年矣後翁入山莫可踪跡
時有見者急追之莫能及里人爲立祠名曰寶仙
呼池曰仙女○縣西北三十里石螺嶺亦有仙女
湖方二畝又云螺石山人跡罕到如螺如仰龜如
躍馬如屏障與香山對峙○皇恩巖舊名月圓巖
在縣西四十里有龍穴水中二珠每秋霽月澄珠
時出游水際熒熒然亦神異也巖狀如魚橫濶十
餘丈前有二潭曰龍曰龜宋天聖中僧法明結廬
其上勅名皇恩○陳石山在縣東北五十里有巖

深廣十丈餘舊傳陳霸先嘗寄跡于此故巖之上
有將臺有兵寨內有劔門九曲洞打屠巷石窓石
梯石鼓龍湫龍池外有天柱劔峰玉峽水簾注水
巖試劔石六和精舍□綿江源出陳石巖流五十
里抵縣前合貢水又合烏村智水銅鉢山灞水羅
田浮圖水流經會昌雩都繞府城入于章○銅鉢
山在縣西北五十里爲縣祖龍巖巖高聳雖天氣
晴朗而烟霧常羃其巔下有龍井井中露石如瓜
禱雨見瓜則多應前有香爐山有騰雲石上有昭
靈祠禱者不絕相近有九仙巖爲九道人乘金龍

處○埤雅廣要云瑞金江氏浴一牝馬于江潭馬
迸入急流四塞雲合風起水波高丈餘遙見一物
光彩耀日鱗甲森然繞馬數匝明年生駒肉赤如
血頭方而腹大耳豎而脊強嘶鳴與凡馬異蓋龍
駒也○縣有龍湖乃在藍田山湖中有龍有蟾蜍
窟乃在泮池嘉靖中池產兩蟾蜍白如玉

龍南縣

在府南四
百一十里

唐天寶元年于信豐縣置百丈鎮尋改名虔南五
代吳改鎮爲場南唐保大十一年陞縣改今名以
在百丈龍灘之南也編戶五里○桃水在縣西

外源出冬桃山會岳山銀山馬坑牛口南北嶺嶠
山及筋竹三指尖子水尾葛溪諸山水入三江口
○玉石巖在縣北五里有石瑩如白玉山半有洞
廣數十丈旁有巨人跡宋太宗賜書百二十卷依
巖建閣藏之下有玉跡寺治平間賜額此上巖也
巖之後重重深入可五六丈傍有石鐘鼓石田圳
之類進登高臺大竇通天明爽空濶正德丁丑督
府王守仁平龍川泐寇班師作平南記刻于洞壁
扁曰陽明小洞天郡守邢珣篆其門曰鞠躬此下
巖也下巖後諸石柱石門扇之類雖刻畫不及凡

六七洞或下而深入或升而上穿視一巖尤勝○石龍窟在縣北十里四面皆石水從中出陰雲始合大雨隨之○三江口水在縣北二十里合桃瀨渥三水流經信江營會零都水入貢有大龍飛湍駛如建瓴又五里爲靈應山岡巒重復吞吐烟嵐望之如列畫屏昔嘗建寺艱于水有禪僧飛錫東行泉如湧出故名○上皇山在縣南三十里樹木森鬱中有古菴曰上皇山名從之又五里爲油瓶山路自上而下平臨溪濱中有巖洞左鐘右鼓又名鐘鼓巖隔水有三石筍森立相向又五里爲清

筍山其高千仞開局一二里上有環山幽水茂林脩竹有寺肇基于唐 國朝改建者登山四顧迥出塵俗別是一洞天也○松梓山在縣南八十里古松瘦梓森然蒼翠石筍三十各高十餘丈○松林巖在縣西南八十里寬曠可居中有古佛三軀至今猶新有峰卓立半壁懸開一竅時平則聞鼓樂聲將亂則聞鉦角聲○歸美山在縣南一百里一名龜尾一名神闕高百餘丈有自然石城左右石峽如雙闕山產水晶果以與龍山對謂之龍頭龜尾南康記云歸美山高數百丈遠望嵯峨有水

出焉四面險峻石城高數十丈周廻三百步又左右石峽高五六十丈勢若雙闕其狀入雲謂之神闕復有石室燦若黃金有鷓鴣鳥形色鮮潔自愛毛羽其隻者或鑿水悲鳴自絕山頂有木枋數百片高危非人力所及石城內有梨食者任意取足持歸輒病或顛仆○帽山在縣南百五十里中有神壇桃果生焉○熱水湖在新興保去縣亦百五十里其湖近河土人以溫處浴身熱處潔牲○冬桃山在縣西南二百里上多桃樹經冬始熟下有溪流名桃川冬桃隘在其上東通和平南通翁源通通始興據險當關可制三回更番戍守又遠有大岳山上有五岳廟素著神靈○龍南龍川之交有三泫水渠魁池仲容巢穴也池大鬢者有幻術急則遁形水草名爲挿青正德丁丑王陽明旣平橫水桶岡遂計誘之觀燈使人與之格鬪傷其目因醫而翳其瞳子搗其巢穴而盡殲之奏立和平縣屬廣東

石城縣

在府東北四百六十里

本漢雩都石城塲三國吳析置揭陽縣石城其封內也南唐保大十一年陞爲縣○輿地紀勝云峰

子山在縣東一里山之太極觀中有紫竹昇仙二臺相傳徐王二真人飛昇之處太平興國中道士吳子真脩龍華會日有二道士同赴已而于雲霧中失去各留詩一章乃徐王也按徐名繼先王名齊祥大中祥符時里有犯魅塑之龍虎山主人曰太極觀有二仙盍不就近求之遂還扣觀門見紫竹臺上有對奕者拜而求之爲書符訖擲筆去不知所之○去城三里崖之半石洞軒豁有三仙壇一名迎恩石又名李獵石○西華山在縣西五里舊名烏石嶂高可千仞登眺之時滿城若翠溪澗分流白如一線凌晨雲罩至午方撤○五龍巖在縣西五里兩崖竒峭潭倚山隈唐貞觀中樵採者見龐眉五老拄杖倚巖傍躡而從之無有也止見五龍交戲潭中樵者驚怖而走○縣東北有雙溪閣雙溪水之所逕也前對劉仙姑山亦名楫仙閣○琉璃山在縣東五里秦人劉華之女名瑤英避亂此山得異果食之能絕粒天下既定出山視里族已失所在乃去縣西南二十里一山峭拔人跡罕至因獨棲其上常跨白鶴往來久之仙去○宋邑人許褒記云劉仙姑名瑤常騎白鵝騰空所居

之山亦名白鵝峰蔣之奇詩有已跨白鵝歸紫府
空留丹竈在人間之句輿地紀勝云劉仙姑飛昇
遺地在蓬萊觀地介于寧化石城之間寧化福建
汀州屬邑也○志云仙姑埋鏡處在縣南十里之
貴人峰又二十里有石梁爲仙姑紡緝所棲兩峰
夾澗上架脩梁亦名仙女石○筍石在縣東十里
拔地侵天高百餘丈其山皆石望之若丹霞左從
石門入洞仰觀一竅如牖天光直射洞中右顧一
石亦復如是○燕藪潭在縣西十里旁有石崖海
燕往來飛止其上○通天巖在縣南十五里石壁
嶙峋深若巨室登其巔方平若原一竅通天獨樹
入雲洵佳境也○丈夫嶂在縣西北十五里其中
凡三十六巖俱有泉石之致舊傳陳邦光宅其下
陳之內子魏宅在縣南三十里名夫人嶂嶂有神
祠按邦光邑人登宋崇寧丙戌進士仕爲沿江措
置使○洪石巖在縣南四十里攀磴而入石門寬
衍如屋奇卉叢生其泉湧出北有剗巖云出米轉
而南爲獅子巖四面峭石如壁路止一線○樓蓋
山在縣北六十里有巖洞相傳楊真人煉丹之所
又云許褒許國讀書處上有石几石牖午夜嘗見

華州府志卷之十二
燈光○中華山在縣南六十里一名鑿龍山上有
仙壇產佳茗○魚骨滌在縣東七十里萬山間石
崖倒垂小潭深靚巖上飛瀑下注蔽潭口內有拳
石曰雞心禱雨者由石上舉篙投詞須臾旋波若
吸而入既入卽出緣崖上奔風雨立至○牙梳山
在縣北一百里盤據廣昌寧化二界有三十六回
元時蔡五九所聚爲巢穴者也今石將軍石牛欄
石馬槽曰缸曰牀曰櫬曰杵曰猶存○灞水源出
栢中里遙嶺會境內古文江諸水西南經灞口會
虔化水入貢

定南縣

在府南四
百六十里

皇朝隆慶二年都御史吳百朋劾撫下歷高砂二
巢奏置次年築城于高砂之蓮塘週四百四十丈
開東西南三門又明年乃立縣治○編戶四里高
興卽高砂保下歷卽下歷保江南卽橫江保皆龍
南縣地伯石卽大石小石伯洪三保皆安遠縣地
又割信豐之南方十里圓魚逕腦及潭慶上保龍
頭嶺內坑諸鄉以益之○白雲山在縣東三十里
其高百仞隆慶初土人欲于此建菴掘地得一石
題曰白雲深處蓋宋淳熙二年勒○又十里爲指

揮嶂峰最高峻而中平窪可容數千人元時嘗有
指揮屯兵于此上有瀑布○龜尾山在縣西四十
里上有僧舍花香鳥韻烟靄霞光可供游賞○神
仙嶺在縣北四十五里上有仙人題字微跡山下
人時見火光爍耀○程嶺在縣西北六十里以分
水爲龍南界○葉竹障在縣東七十里頂有長流
水莫知其源山下田資其灌溉○九洲河在縣東
北一百里會高砂橫江下歷楊梅諸水流入龍川
其處有圓魚溪源自南坑圯分水會龍頭嶺下水
流入信豐龍洲出內江會大河嘉靖末年丙寅渠
寇賴清規爲邑大害知贛州府黃辰單騎入下歷
招撫之賊防稍懈都御史吳百朋督叅將蔡汝蘭
以六月初三日進兵首破楊梅州斷賊右臂遂奪
神仙嶺賊懼退保鐵爐坑已斲樟木嶺及鑊鋏寨
賊窘率親信六百人據銅鼓嶂待援銅鼓爲廣東
龍川縣地宋時儂智高據以爲窟穴者七月初四
破鑊鋏初六破銅鼓賊夜走葫蘆洞反匿苦竹嶂
林中自殺髮長七尺高砂渠首謝允樟始悔罪自
縛詣軍門獻地

長寧縣

在府南四
百二十里

皇朝萬曆三年都御史江一麟計平安遠黃鄉保賊巢穴奏置明年築城于馬蹄岡週四百六十二丈有奇立四門于治後建鎮山樓閣○青龍巖在縣南三十里大小十餘穴清流縈抱有佛閣陟降俱由棧道以登○登頭嶺在縣西北四十里經行者必登其絕頂路乃得通故名○尋鄔水在縣東五十里流入廣東龍川縣之赤石渡○丹竹樓在縣南五十里卽丹竹嶺也與平遠興寧接壤其民悍健可藉爲兵○頂山在縣東南五十里閩廣之交雙峰從翠內有飛瀑○鈐山帽山俱在縣西七

十里鈐山有僧舍秀拔冠于群山○大帽山在黃鄉保去安遠縣二百餘里與廣東平遠和平興寧龍川等縣接壤山綿亘數百里中有老虎隘林木深阻鳥道三十里內絕無人烟群盜窟其間多歷年所最後程鄉人葉芳來併諸盜有衆七千分爲七哨號曰滿總芳死妻曾氏代領其衆同黨杜栢欲娶之不許又辱其媒因而相仇嘉靖乙未年尚有衆三千頭目數十號曾婆兵曾死芳兄廷春領之愈橫壬寅秋兵備副使薛甲計擒廷春併其二子伏誅萬曆乙亥都御史江一麟偕知府葉夢熊

發兵分道入其窠渠魁葉楷匿于賴舍廟兵環廟焚楷死黨盡殲之。杜栢于正德末年與葉芳同受王新建招撫王安插其衆于縣百里外號新民與芳從征宸濠不盡受約束攫數萬金而還栢又與安遠三十六族有怨就中孫宏最深葉天序者宏姻也糾族千人併孫族千人合曾婆兵三千共五千人爲窠相持數月署南贛兵備周莓崖計杖殺之蓋嘉靖乙未年事

南安府

在省上流南領縣四

史記秦始皇三十三年使屠睢將兵十萬守南楚之嶠此卽漢鄣郡之南楚縣地吳始置南安縣屬南部都尉晉太康元年改安爲康三年罷都尉置南康郡隋復改郡爲虔州南康縣皆屬焉宋淳化初始于大庾縣立南安軍從知南雄州查陶之請也元改路 國朝改府

大庾縣

附郭

漢武帝遣將軍庾勝討南越築城于此隋因立大庾鎮唐神龍元年陞爲縣○志云古城池在水南

驛使門之南舊北達廬嶺之路也其西南隅卽今城隍廟後郡人猶稱土城背蓋是時章江自西而南折若規故城因其勢元時水流經過郡治城遂中斷郡分爲二至元壬辰始改築今城南瀕章江東北帶溪惟西稍高爲隍城狹而長微銳類魚名魚城相傳有二井爲魚目一在城內一在城外魚背圖○城中有三臺府後堂東偏者爲中臺後改風月臺嶺北道公署後爲東臺侍郎劉節宅內爲西臺又有超然臺宋建者下有池多花木□中臺自宋周濂溪先生爲軍司理時程大中爲通判遣

二子從學焉明白沙先生陳獻章應召宿此臺作詩云黃菊花開又一年南山無分對陶潛不知風月隨儂否惱殺臺中此獨眠○同知廨內有尊勅樓宋司法廳掌勅令也通判廨內有延松堂宋寶慶間石曼卿書扁淳熙戊戌軍倅胡藻又劉張九成題寶界寺柱數語欵于東楹○府治西有宋僉判廳元爲南安塞兵萬戶府舊有碑刊烟瘴藥方其上今爲民居○又有宋甲仗庫中藏甲冑刀盾之屬二三百具城守雜器稱是蓋狄青收儂智高之餘物也○治門外宋公使酒庫有一堂曰芙蓉

堂曰燕堂郡酒名宜城春其坊皆列務女依酒經
 釀造元豐間黃庭堅典南安試貢院飲酒有詩○
 寶界寺在府城西北宋皇祐初建地勢本崇寺復
 閎敞內有劉器之經偈刻石江民表輪藏記翻刻
 吳道子佛像及劉江張三公小影碑□按劉安世
 以紹聖中謫知本軍尋改提舉洪州玉隆觀本軍
 居住奉母夫人寓止寶界後一年復徙嶺南瀕
 數四蘇東坡嘆曰真鐵漢也今寺西廊有鐵漢樓
 本此○蘇長公外傳云以紹聖元年甲戌安置惠
 州八月度嶺丁丑復責授瓊州別駕昌化軍安置

庚辰始命提舉玉局觀任便居住辛巳元日始度
 嶺北歸南安守曹登等與郡士人爭相款待于此
 有譙樓及觀音寺千佛閣題壁廣化寶界寺墨竹
 常樂院偈又過南康田氏九經堂楊孝本別業游
 詠倡和諸生隨行至吉州清都又為作本軍學記
 後張九成手書勒于石□按長公墨竹在寺東廊
 鐘樓下有謔韓侂胄者刻其壁函盛以獻京師因
 渡錢塘江溺焉今墨君樓竹乃元人補為之者□
 蘇文忠集懋庶東常樂院作經藏銘云佛以一口
 而說千法千佛之口則為幾說我法不然非千非

如百千燈共照一室雖各徧滿不相壞雜口文
患又戲掃竹石于院壁張九成跋云東坡先生自
海上北歸過橫浦到常樂戲掃竹石于壁輪困離
奇跌宕傲兀想風月中磅礴乎萬物之表而徜徉
乎八極之外豈世間筆墨所能到耶埋沒荒寺久
矣紹興癸酉十一月郡守王徽倅李知止恐風霜
剝落命工摹刻置之郡治以傳不朽俾范陽張九
成書其後云○名臣言行錄云紹興中張子韶與
僧宗杲爲莫逆交時時往還秦檜恐其議已于是
言者伺意論之遂有南安之謫旣至寓軍之寶界

寺結廬日與生徒講藝退則手一篇倚柱就明積
久柱下蹶蹶雙趺隱然因自號橫浦居士題柱以
識云平生好書老來病日執書就明于此者十四
年矣淳祐中軍倅胡元質剗其題柱去曰恐久而
壞也知軍李大正曰筆迹之壞孰與跡迹明日訪
于寺則併跡亦失之□寶界法堂之後有龜泉
烹茶煮藥皆宜無垢亟稱之蓋其初掘井及泉下
有石龜泉從龜雙目中涓涓出云○金蓮山在城
北狀若蓮花下有法華寺俗呼金蓮堂爲迎送候
館因有松風壇墨花亭舞劍臺諸勝寺左鐵岡上

有猴獅臺一名候使臺前稍左爲立屏山又名木魚山皆以形似而名○嘉祐禪寺在城之東隋建唐改大雲其左廣化寺卽大雲之羅漢堂也有蘇子瞻畫竹 皇朝萬曆中大宗伯王弘誨倡範鐵佛一菩薩二諸天二十四俗呼鐵佛寺寺左有湛泉二○石壁去城東一里延八十餘丈瀕于章江舟人挽纜之路其右爲獅山山腰有惠泉泉右有龍母祠○言行錄云橫浦炎方隆寒無雪邦人或垂白莫之識故癘疫爲多郡有龍君廟所祈必應張九成曰吾無職隸而歲耗廩祿盍思所以惠之

因禱焉朝暾杲然而陰雲倏起晡時寸積矣邦之童稚駭走觀瞻以爲異□其處有惜母嶺俗傳許旌陽旣斬蛟追小蛟至此小蛟回頭顧其母今嶺下有惜母村左轉石勢峻峭盤渦曲折得一坳處立大通院其中有石洞石竈○東山在城東南二里限以橫江山半西凹林木蒼翠中有仙翁菴五山亭花雨樓志云仙翁菴元爲真覺寺小河橫山下大河西來相會若縈帶然從寺俯瞰兩城如合璧寺之檐有泉鑿爲曲水蒙川館在其上又有下馬松醉石左折爲亞東山山稍左脾峽中石坂如

砥泉泠泠漱嚙之又名南山□蒙川先生劉黼之別號也黼爲太學生時劾丁大全之奸安置南安軍及少帝航海委身與陳宜中俱至羅浮病卒而家死于海明太守張弼爲作館表章之僧性定者住蒙川館從下汲爲勞以符呪之曰泉且上來與老僧洗鉢逾時香積傍石竇出一水名曰上泉其麓有漢臺侯廟祀梅鉤○驛使門在城南一里前後臨溪卽貢院舊址是爲橫浦驛○印山在驛使門內南安有七丘舊名七星此其一也週遭爲池山阜巋然中央如印產鶴來巢蓮一莖五莖○

江水自西來橫郡治南門外有迴龍石長數丈背弓起下空虛如龍踴躍勢江水發源湖廣郴州上章界因名曰章經崇義縣西南聶都山東流百二十里至府北流二百六十里至南康之芙蓉江又北百二十里至古虔州會貢水爲贛江○志云水自石陂頭而南橫驛使門外五板橋邊合大小沙五板水下東山麓會爲江至龍母祠前○水南城在章江南與郡城夾江而峙民居稠密倍于郡城明嘉靖辛酉剏築周四百二十四丈闢東西南三門其北瀕江爲水門橫亘三百五十七丈有奇水

南城之南門曰梅山門外卽梅嶺路街也有五里折梅亭○出驛使門出嶺路街至庾嶺而達南雄始唐開元中內供奉張九齡鑿開山巔爲路宋知軍蔡挺始甃甃之按庾嶺之路交廣要衝貢獻從入民以僱值爲利而迎送勞費亦因之自昔南雄南安兩府共給其役騾驢馱載少壯負擔皆于中途轉換○路碑略云北貨過南者悉皆金帛輕細之物南貨過北者悉皆鹽鐵粗重之類過南者月無百馱過北者日有數千先是南雄人創議南貨過北直至南安城下北貨過南直至南雄城下以

專擅其利知府張弼始會南雄復古規中站轉換立石道傍○水南之西管界都有玉池坊池產青蓮其莖差小不結房色如碧玉與凡蓮迥異地勢高洪水不能及故有水滿玉池蓮之識○水南濱江有寶積寺新城南門外有石佛寺寺有雪巖居明景泰中知府金潤爲禪僧善寧作記自書丹刻石留小影以鎮之○縣西四里有宋解太尉墓太尉名潛謫居于此又有太尉菴遺址松林森鬱近城之山惟此中有林○城北五里有牛相公墓在金湖坊鄧家山下墓高五六丈旁環列小塋二十

餘陪塋今多夷乃犁鋤之下徃徃得銅錢器物無名可考○其處有五指嶺一名五侯山卽玉枕也爲郡之主山高三百仞連延三里與五峰相屬有慧覺院周茂叔亦嘗游焉陳獻章應召經南安寓此與知府張汝弼酬和有玉枕詩話白沙先生詩云一枕秋橫碧玉新金鰲閣上見嶙峋使君得此全無用賣與江南打睡人按金鰲水南城北門名也○縣西八里舊麟林鎮之羅漢洞崖口如門爲石十有八排列左右若羅漢泉灌其頂又有石梁丈餘危峻不可度○歐公洞在縣西十里山隈水出

多產菖蒲一寸十二節有卧石上竅爲槽似劔匣然巨石中斷名試劔石○其處有西華山石壁如削循磴而上平行可田有宋僧院院前有澗兩岸及底俱石名曰石澗無魚蝦傳是神龍所游明弘治間知府鄧公闢澗傍得一石甚平命曰釣月臺澗底有卧僧遺迹箬入石內五體俱全澗水流掛石壁爲瀑布凡三十餘丈南有石洞可坐十餘人左有松數千株皆直幹無傍枝又有老樹五幹自地摩空亦無枝蔓○志云小梅嶺有二其一在城北里許一在城西南十五里游仙鄉唐開元已前

入粵之路由此相傳騎羊五仙人由此過章水灘
○縣東北二十里丫山兩峰尖削如馬耳故名山
有巨人迹靈巖院有辟支佛牙及宋棲真塔○婦
娥障在縣南二十五里峰開撒如幙帟故名舊傳
葛洪煉丹其上丹液入土而產仙茅本草大庾出
仙茅服之輕身東海張弼詩云庾嶺仙茅舊有名
隨時采服可長生使君昨日纔持去今日書來乞
墓銘載玉枕詩話○大庾嶺漢志名臺嶺嶺有石
平如臺在縣南二十五里鎮山也形如廩庾又曰
漢有庾勝者梅銷之將隸番君從高帝定天下使

分兵守臺嶺築城嶺下名庾嶺又名梅嶺白氏六
帖大庾嶺多梅南枝旣落北枝始開張無垢語錄
云大庾舊多梅居士到此數年始登嶺不見一枝
吟云詩人嘗說嶺頭梅往往春風自此來我到嶺
頭都不見空將春夢又空回○嶺上有寺無名氏
題壁云妾幼侍父任英州司寇旣代歸以大庾有
梅嶺之名而反無梅遂植三十株于道傍因題詩
云英江今日掌刑回上得梅山不見梅輟俸買將
三十本清香留與雪中開○宋嘉祐中立關于嶺
上植柱揭名梅關以分江廣之界嶺下舊有官驛

庭院甚整宋郡守趙孟邁扁曰梅花國蓋自此而上嶺曲皆梅故名○通鑑秦始皇三十三年以謫徒五十萬戍五嶺大庾其第一塞之嶺也秦使屠睢將兵十萬守南楚之嶠卽此廣記名東嶠以在五嶺之極東處圖經云山延袤二百里上有橫浦關卽秦塞上又名塞嶺□張子壽集云初嶺東廢路人苦峻極開元四載冬俾使臣左拾遺內供奉張九齡緣磴道披灌叢相其山谷之宜革其坂險之故自後歲又驛路荒遠室廬稀疏往來無蔭庇宋嘉祐間蔡挺詳刑江西弟抗漕廣東乃商度工用陶土爲甃各甃其境北路廣八尺長一百零九丈南路廣一丈二尺長三百一十有五丈至今猶有存者仍復夾道種松以休行旅遂成車馬之途其支山曰南源飛瀑百丈下有湫潭深不可測其寺曰雲封又名掛角在庾嶺上有唐六祖圓明真空大鑿禪師塔左有卓錫泉右有展衣坪放鉢石檀經云六祖自黃梅傳衣鉢圓曹溪五百僧爭之追至大庾嶺久立告渴祖拈錫杖點石泉湧清泠其美衆駭而退按今張曲江祠卽雲封寺處□嶺下有庾嶺驛宋之問題壁詩云陽月鴈南飛傳聞

至此迴我行殊未已何日復歸來江靜潮初落林
昏瘴不聞明朝望鄉處愁見隴頭梅末蓋用陸凱
寄范曄詩中語及本郡之驛使門亦用此詩其實
非大庾事○橫浦關在縣西南三十里秦時關也
劉嗣之南康記云漢命楊僕討呂嘉出章郡下橫
浦卽今縣西南故橫浦關以郡城臨章江自西流
東橫繞南岸而名□關內曠谷可容寨柵卽古入
關之路及張九齡開鑿庾嶺此關遂廢又云安庾
里有游仙徑崎嶇陘石中六七里乃抵關路兩山
對峙相去表丈關之外南下亦峻關之內有廣谷

九柵故址蓋隋開皇十年番禺王仲宣反立九柵
大庾嶺詔裴矩進兵擊破之□吳錄云南竺縣有
大庾山其路峻阻縲轉而上踰九磴二里至頂下
七里平行十里至平亭平亭者橫亭也爲古入關
之路○志云縣東三十里有蜜水源出雲主山南
流經小蜜橋入于章江有大龍山延亘三里狀如
游龍自下登山計八里許上有幞頭及梳粧二巖
○青龍岡在縣東北三十里大畧村以頂有青龍
見得名郡國志云徐道覆欲上青龍岡大電繞身
雷震而止祥符圖經載岡與傀儡山俱在庾嶺左

右上有石時放光明號鏡石爾雅云山多大石曰
礪註曰多礪石也鏡石右有慧光菴後有聖果寺
寺後松萬株□漢陳蕃子孫冢在岡上南康記云
蕃被誅家徙日南又追至此滅之因葬其處漢史
不載今其墓高大南安志以爲或仲舉友人朱伯
厚輩爲之收葬嘗有發冢見大蛇纏墓風雨晦冥
乃止○輿地紀勝云穀山在縣東北五十里高千
仞上有石頂圓如人形有池產魚能五色○玉泉
山亦在東北五十里兩山峙立如門一逕入山二
里許相傳晉蘇耽居之泉側清涼無暑玉泉菴前

磴石爲橋溪水嘗齧橋菴僧刻石爲函貯金剛經
以鎮之○大明水在縣西南六十里水出傀儡山
北流至大明江口入江○龍山在縣西北六十里
四山環列有坪有溪二石如獅象背有巨石如人
騎之○雲山在縣東北七十里產異桃先禱之乃
敢食然不敢持歸○涼熱水在縣西百五十里同
源而異性熱水池圍二丈餘深尺餘流四步而合
凉水東入章江○城池志云廬嶺北四十里爲新
田城又五里爲鳳皇城以近鳳皇山也鳳皇西十
里楊梅村有楊梅城俱嘉靖四十四年築楊梅北

十里爲小溪城舊有小溪驛今遷去先十年築小溪東五里爲九所城亦四十四年築小溪北十五里爲峰山城其人善弓弩皆撫臣王守仁所勸也

南康縣

在府東北一百二十里

元和郡縣志云本漢灌嬰所置南茭縣也至獻帝時孫權析立南安縣晉太康中改曰南康按今南茭水馬驛卽漢縣處在學宮之左而晉縣在今治西南隅二百步○南茭水卽桃水也出紅桃嶺故名桃水下流合蓮塘水入章江有南茭灣源出豫水歷南坑與蓮塘水會西符水在縣北源出錢山

東流二百里至南茭口入章○綠微臺在縣治內宋相陳升之父爲主簿時以石甃臺亭其上扁曰綠微後宰易名陳公臺○宋縣尉司在今治東迎恩門內洪武中築城于其處○縣前有秀公坊以升之嘗宰是邑民思其德因謚曰秀乃立坊以志不忘○治東七十步有蘇步坊蘇子瞻南遷經此過田如鼇六經堂留題因名坊側有井深而列石其底如盤而九竅泉自中湧汲之者衆終無涸時○縣東南隅有玉字井其水清澈玉字街以此爲一點故名○南街有壽龜池街形稍低衆水所聚

而瀦爲池青囊者言城中地形偃伏連接如五龜
此其一○綠池在縣東宋初出石碌處白鶴池在
縣西今爲民居○祥符寺在治東北宋大中間南
康士人鍾福讀書寺中嘗手植一小松夜夢人曰
松圍三尺子當策名寤而惡之後三十年始登科
南歸視松一如所夢松高百餘尺凡四十九枝偃
亞如蓋畫工圖南康松以傳者此○西城外仙臺
觀宋建炎間偶有羽士僦居觀中未幾示疾鄧道
士遇之不厭謂鄧曰死葬我後三日幸發視之鄧
如其言惟見白石一雙本觀三清殿東二井相對

如呂字相傳呂巖僦居時以杖拄地所成又云洞
賓棄丹井中因名丹井○城東門外有唐貞元間
六祖院宋蘇子瞻南遷改名傳法寺城南南山嶺
有宋紹聖初寶梵院相傳南巖朝夕鐘鳴與譙樓
鼓相應又名南山院○芙蓉江在南門外源出轟
都山章水委注至此澄淥泓深江之南平沙橫衍
數里皆民居從下行里許入東山徑有芙蓉巷又
東去十里有芙蓉橋相傳唐時沿岍多植芙蓉一
夕盛開初日映江纖妍可悅○鴨子湖在縣水南
湖水漣漪丘阜突起左有龍珠巷紫荆山湖傍建

亭榭平疇周環多古松喬聳蒼翠東坡先生嘗憇
其上有詩○東華山在治東一里江水滌洄若帶
甃石爲長隄前有平臺後有僧舍及叢桂觀瀾兩
亭稱郭外佳勝鯉山髻山俱在其北鎮下流爲水
口關○九日山在縣北一里治之主山也陳升之
母方娠夢神人謁見自稱從九日出來已誕升之
實有蛇蛻之異因名旭旭登第後復宰南康因築
旭嶺書臺後避神宗廟諱改升之仕至宰相謚秀
公今山椒有旭亭○南臺山去縣五里舊名南山
後以山出莎草名南臺山詩云南山有臺註曰臺
夫須也卽莎草服之已疾卽此有石巖可坐十餘
人月夜風籟過客時時聞鐘磬聲○東山在縣東
南五里盤迴突起與二南山連峙章江自上流來
逶迤邇而下里許有七星棋棋平行十餘畝中錯
起七堆如北斗因名焉山半有寺有古塔塔前有
女貞樹傳是宋劉元亨所植○潛仙山在縣西五
里相傳建炎初呂洞賓化爲羽士潛寓山中故名
○蓮華山在縣西北五里周圍豁澗縈遶田疇田
中一丘全體凸而內凹形若出水蓮花池左有百
家湖右爲安舒橋又東北行一里爲龍岡前有龍

潭山與蓮華對峙○獨秀峰在縣東南二十五里俗名雞籠山下有龍湫宋紹興甲戌蘇軾南遷登之見其秀拔更今名及北歸作詩云倚天曉絕玉浮圖肯與彭郎作小姑獨秀江南知有意能三二別四方壺謂大小別及方丈蓬壺瀛洲也○高靈山在東南三十里與獨秀峰並峙山勢巍峻躡蹬而上爲三天門相距各里許門各磨崖鐫字最上爲朝元閣時有雷電遶之山周廻十餘里有田有瀑布泉水四注折而左爲塔院嘉靖初大安禪師坐化處迤東數里有勝龍山北出九牛抵玉潭山爲往來通逕山麓有菴曰盤龍晴日從上眺城市風烟繚緲稱爲奇觀又東去一山名青隱與贛縣武林山相望○浮石在縣西三十里形如覆鐘水環其外爲上游勝槩有唐顯聖院宋建中靖國辛巳蘇子瞻艤舟訪元師題院壁云渺渺昏林集曉鴉村村烟火梵王家幽人自種千頭橘遠客來尋半結花浮石已乾霜後水蕉溪閒試雨前茶不如一夢歸南去翠竹江邊繞白沙○去浮石五里許有實石雄踞如虎高二十餘丈連亘五十餘丈因踞實岫名之以與浮對○蕉溪在縣西三十五里

源出鍋坑流至浮石入章水因蘇公有蕉溪間試
雨前茶之句因名○封侯水在縣南三十里源出
布尾東流至校溪又西南入涼熱水經此入章江
以漢梅鏞曾列營水濱後封臺侯故有封侯水之
名○鹿鳴山在縣北四十里鹿鳴鄉塘江之水南
沉塘裏爲沙溪迤東二十里爲入三江口經湖頭
而會貢水○玉潭山在東北四十里地名潭口濱
大江水經云豫章水道源東北流逕南野卽自此
潭東注潭水澄澄如碧玉○禽山在縣西北六十
里俗名蒙山高二百餘丈連亘百里入上猶界禽
之水東流百五十里乃至南埜口○蓮塘水在太
平嶺下去縣八十里源出余源嶺東流二百四十
里經刀石湖至芙蓉江而會章水○河田水在縣
西一百四十里黃雀坳源出至坪里船塢派分爲
二其一界茹平桑瀾注龜湖而出長龍其一自新
溪逕長龍合爲至坪江又四百五十里至太平里
瑞陽江合于章水○唐綦母潛能詩南康人

上猶縣

在府東北
二百里

後唐同光二年黎求代盧光稠爲州刺史遣判官
李照刈南康縣之西南一鄉半置上猶場于靈巖

寺北以地有猶水為名南唐保大十年陞為縣○
 志云猶水在治東半里源出湘廣桂陽縣經猶石
 而下入南康界又半里為鎮前潭即猶水所派注
 ○湖南益漿水四百二十里至上猶縣名縣前水
 按在南門外數十步是○龍歸坑在治北學宮後
 因制置使李綱過此立李相亭其上今改騰龍嶺
 ○南山在治南方山在縣東各去城二里高聳插
 霄形如覆斗○縣西三里一山形如香爐屹立水
 中名香爐石○大猶山即猶石障在治北二十五
 里遠望如獸蹲立故名山後有月巖竅圓如月徑

數十尺表裏不隔其中有池神龍居之名龍池○

馬迹嶺在縣東北二十五里石路間有馬蹄迹十餘

涔傳云昔仙人騎而過此○小梅嶺在縣北三十

里俗傳梅福嘗煉丹于此今井竈祠址尚存有天

池乃其藥臼所陷泥塘因之積水四時不竭○琴

龍山在縣西三十里地名琴江其下有龍潭水派

流二十里琴口渡○縣東北四十里有九十九曲

水源出上坪逶迤凡有此數○輿地紀勝云縣西

介于江西湖廣廣東三路有大章山延袤數百里

出巨木美材通鑑晉義熙六年云初徐道覆使人

南安府志卷之十三
伐船材于南康山中至始興賤賣居民爭市之船材大集而人不疑至是悉取以裝艦盧循寇長沙道覆寇南康上猶縣本南康地附記之

崇義縣

在府東北一百里


本上猶縣地峯人謝志珊等嘯聚于此先是廣東湖廣旱饑流民逋逃至上猶深山安插種山薯旱禾高粱官司未遑驅逐後遂爲盜編民苦之號曰峯歲益甚督臣守仁以聞詔許三省會剿兵自南康入破橫水溪左賊徒走桶岡尙我兵連戰破尙誅其渠帥脅從者釋使服業詔立今縣割大庾之

義安里南康之至坪上龍崇德三里上猶之崇義鴈湖上保三里益之乃正德十二年事○縣治設于橫水地近上猶之崇義鄉因以鄉爲縣名築城周廻五百四十餘丈闢門四三面臨溪南有太平橋跨溪抵門惟西南鑿濠治後半里其山名旗因縣名改曰崇山其地多產茶及水竹有符水山在西南五十里一名浮竹坳產符竹小而輕又有西符水在縣東南六十里入于章江○南原水在西南五十里出南原山東流合符水口入章江○聶都山在縣西南六十里高一百六十仞連亘四十

里相傳昔有聶姓者開都以聚民故名產雜木石其水流入南康縣爲南礬溪山海經云聶都之山礬水出焉其山出礬石卽此□雙鶴洞在聶都山右舊名石室近洞有石室寺今名妙因洞有井正圓廣尺而深不可測相傳神龍居之昔游人溷此井龍化雙鶴飛去翔翥久之不知所在洞可容百人石乳凝結上如列星下如鐘鼓擊之有聲又有如佛像牀榻別有巖穴相通泉清可酌名觀音池□聶都山下有獅子巖巖內明爽可坐百人巖西斗田其上多礬石遠望如雪○縣出茶磨以石門

山石爲之蒼礬石縝密鑄琢堪施以磨盤與輪同璞者爲佳其最謂之百石猶硯之舊坑也脉紅如線極鮮明不過三兩線今亦艱得土人又以白脉者爲銀線黃脉者爲金線○麟潭在治西百里水竹坑口源出益漿山昔有獸見潭上或以爲麟潭之水東北入章水○潛水在治西百三十里源出樟山洞流數里入地而復歛出形家謂之潛水土人曰鑽水○寰宇記云益漿水源出聶都山東流入貢水合西符水至南野口合良熱水○封侯水源出封侯山水淺不通船西南入良熱水○良熱水

昔名豫水漢置豫章郡因此源以爲名



卷之四